

金
文
通
公
集

金文通公集卷之二目錄

吳江金之俊豈凡著

同升錄序

順治乙未會試錄序

戊子兩浙貢士同年姓氏錄序

成均語錄序

周彞初先生撫東奏疏序

金文通公集

卷之二

目錄

大中丞韓公奏議序

自知錄序

金華遊記序

吳羽三行稿序

丁飛濤行稿序

王氏家譜序

木香張氏族譜序

乾坤法象序

蘇州太守吳瑤如公祖去思詩文集序

金文通公集卷之二

吳江金之俊豈凡著

同升錄序

上御極之五年秋七月十四日辰時內三院吏部欽奉
聖諭陳名夏升吏部尚書謝啓光升戶部尚書李若琳
升禮部尚書劉餘祐升兵部尚書黨崇雅升刑部尚
書金之俊升工部尚書徐起元升都察院左都御史

該衙門知道欽此諸臣不敢例辭各祇遵謝

恩受事訖因退而嘆曰我儕待罪卿貳數載于茲不過謹守繩墨奉行故事而已揆之職守未有寸補宜從幽黜之典忽荷顯擢之恩俾疎遠舊臣獲隨展土開疆攀鱗附翼之宗親勲舊並列正卿渥哉

君恩也宜有以紀之爰視同年同咨例梓云同升錄錄成而臣之俊謹拜手爲之序曰漢官之得爲正卿乃自諸臣而始乎不勝感尤不勝懼也嘗攷之周官太宰掌建邦之六典以佐王理邦國地官大司徒之職

掌建邦之土地之圖與其人民之數。春官大宗伯掌建邦之天神人鬼地祇之禮。夏官大司馬之職。以九伐之法正邦國。秋官大司寇掌邦之三典。以佐王刑。邦國冬官之屬有考工掌百工之事。曰國有六職。百工是其一焉。御史臺掌贊書而授法令。歷代因之。異其名。不異其職。凡邦國之有未靖。與法令之有未行。則均無所辭咎焉。蓋六卿與御史臺之爲任綦專。而責亦綦重矣。

清朝鼎興。設官一沿舊制。獨部院之長。則皆宗親勳

舊爲之良以從

龍諸臣邦國同休方克膺斯任而無忝厥職也漢官僅爲之貳尚惴惴虞弗稱然猶可諉曰邦國大事當爲者長任之我欲爲而未得爲耳茲名夏等七人不由廷議簡自

宸衷一日而擢爲部院之長視猶滿官則旣予以得爲之名而并畀以得爲之實矣得爲而弗能可懼也卽未必果有得爲之實而亦已居得爲之名矣無其實而居其名更可懼也然則諸臣猶可諉曰邦國大事

自有爲之長者任之哉。黜陟之有乖衡歟。國計民生之有偏絀歟。典章禮樂之有未備歟。六師弗張而偃武無期歟。五刑未允而獄有寃民歟。帑藏或糜于工作紀綱或弛于臺憲歟。凡若此者皆諸臣之咎也。故曰漢官之得爲正卿自諸臣而始不勝感尤不勝懼也。自今以往相與切劘砥礪奮其所得爲勉其所弗得爲祿位彌高則宜居之彌淡職守愈重則當持之愈謹以庶幾無負。

君恩之優渥使他日睹斯錄者曰

朝廷之重視漢官有如此諸臣之能自重而卒爲漢官重者有如此漢官之不厭薄于

朝廷實始自諸臣者有如此則茲錄也匪直識一時墮簷之雅且以賡千載喜起之盛也否則後之人將有歷指其名而議之者矣嗚呼其可懼爲何如也耶

一意廻折讀之懼心油然而生文章可以移情真如伯牙之過海上觀水嘯鳥鳴也

陳百史先生評

順治乙未會試錄序

順治十二年乙未春會試天下士。

上俞禮臣請。

命大學士臣額色黑禮部侍郎臣恩國泰典滿洲蒙古試。臣之後同臣兆龍典漢試及烏金超哈併東粵藩生試先是甲午歲恭上

皇太后徽號禮成。

恩單中外特廣進士額乃進禮臣所貢士約四千四百有奇。腐闡試之滿洲蒙古得士賈勤等五十名。另爲

錄以

獻漢士及烏金超哈併藩生得士秦斌等三百八十五名錄其文優者二十首如例進

覽臣當殿言簡端伏思臣之後陋劣無比自釋褐以來離盤槧幾四十年且歷任簿書未窺中秘老耄荒迷衡文益非其任也臣旣弗敢先期預辭比屆期又弗獲辭受事之日惴惴焉有負

成命是懼謹與同事諸臣蠲潔身心焚香誓約苟一念不可告

天不可告

君父併不可對衾影而質多士者立召殃咎務各矢公矢慎殫力搜羅勿枉置真材勿倖收贗鼎取士之式一以尊經旨宗傳註爲主不敢偏狃臆見以人從我不敢膠執體裁以此槩彼其文醇亟收之醇而不能無小疵亦收之若離經畔道習爲奇險頗僻之詞縱橫於繩墨之外者則雖佳弗錄蓋言者心之聲也孟軻氏曰作於其心害於其事作於其事害於其政心不正而欲政事之毋害不可得也言不正而謂心術

之必端不可得也茲欲收正人以正天下必自其言之正始故終不能以憐才之心勝反正之心然士而果才也苟洗心滌慮一赴平康正直之的閱三歲不虞其終棄也則臣等區區反正之心亦未始非憐才之心雖然茲所錄之士能於尺幅間範我馳驅者遂可侈言得人而以釋臣之懼心乎未也昔先正有云每歎天下才士甚盛文不逮古人才吏甚盛治不逮古人議論甚盛事功不逮古人名位甚盛真心憂國不逮古人其病坐浮而不實也旨哉斯論儻其言正

矣而其心浮而不實則自茲登進以後他日之爲州
邑長吏者果能廉潔慎勤無愧循良保障之任乎爲
六曹分典者果能協恭熙績無愧亮采惠疇之誼乎
爲監司郡牧者果能端本表帥無愧承流宣化之責
乎爲耳目臺諫者果能殫赤抒忠無愧鳴鳳殿虎之
稱乎爲珥筆

禁墀者果能黼黻增華無愧天祿石渠之選乎爲擁旄
秉纛之大吏者果能安內攘外克勝金湯半壁之寄
乎多士於此有一之不能則皆臣今日所取之浮而

不實也。求其一一逮古人誠有如先正所歎矣。

皇上之期臣以得人者固如是乎。臣故曰未可侈言得人而以釋臣之懼心也。然則臣今者旣軌士以正更當課士以實。惟實則不傳舍其官而精神專營職業矣。惟實則不自便身圖而操守勿徇嗜慾矣。惟實則不植交要譽而乃心以之盡瘁王室矣。使異日者自綰半通以至歷踐三事九列無在不號稱得人而後臣今日所取之士方可以仰答。

成命耳。夫如是以言得人則臣之懼心更何時而可釋。

也哉嗚呼詩不云乎小心翼翼夙夜匪懈以事一人。
臣與諸士孜孜戒勉期終身如一日以對揚
天子休命者惟此心而已

戊子兩浙貢士同年姓氏錄序

太學張生隣。曾言于余曰。今歲吾浙貢士集。闕下者。六十有三人。計恩貢一十人。應

今上御極之覃恩也。歲貢二十人。諸侯歲貢士于天子之成例也。拔貢十有八人。簡秀良以補鄉書之闕也。又拔貢監十有五人。升郡邑之優于文行者。光辟雍之選。周禮所謂造士。卽兩漢所謂博士弟子也。其試于廷者。各授職有差。其在成均者。候試棘闈。未膺選授。雖

筮仕先後不同顧

清朝鼎興多士連茹彙征之期不可謂非千載一時也因梓有同年姓氏錄以識盛典而佩

君恩請先生一言弁之余曰微子言余亦不能已于言也從來人才難得而世之賢豪亦不常聚今吾浙有士六十三人雲蒸霞合于茲豈偶然哉其才堪以治民學足以爲師者亦既奉

除命而往蒞乃職矣餘博士弟子員皆譽髦登進非前代入貲授納者比亦指日應制高等行將策名南宮

待試于

天子矣。嗚呼。諸子思人才之難得。則慎毋稍自褻。越綰符者。必期無負民牧。秉鐸者。必期不愧人師。儲養太學者。必期無忝春秋兩榜。思賢豪之不常聚。則當饗慕古人之道德行誼。文章勳業。所以不朽于人世者。互相觀摩而勗勉。勿徒以杯酒讌洽。鳴埙吹簫。遂侈盍簪之盛。使異日者。書之史冊。曰順治五年。禮部貢士。得人。惟兩浙爲最。云則諸子之所以報。

君恩而光盛典者。庶于茲錄焉可攷也。余之所以不能

已于言者此也。張生聞言唯唯曰敬以先生之言轉告諸子。

入議論如前叙事更難老手執筆天真爛熳

陳百

史先生評

成均語錄序

董仲舒曰。養士之大者。莫大乎太學。太學者。賢士之所關也。教化之本原也。興太學。置明師。以養天下之士。數考問以盡其才。則英俊宜可得矣。若是乎。學之關於教化者重。而師之所繫于學者尤重也。

清朝鼎興。崇尚學校。慎選師儒。視前尤加懋焉。大司成孝緒胡公。以碩學茂修。特膺

簡命。毅然以興起教化爲已任。謂古人學而後入政。未聞以政學今日遊辟雍而執經問難之輩。卽他日綰

卽綏而敷。教宣化之流。若不講明聖賢立言之旨。何以發揮聖賢澤民之學。曾子固所云以不學未成之材。而爲天下之吏。又承衰弊之後。而治不教之民。仁政之所以不行。盜賊刑罰之所以積。此皆造士者之過也。余之所怒焉大慮也。于是日進生徒而橫經講道。反覆提撕。響如振玉。日積月累。彙之爲成均語錄。每發一義。必解去粘縛。脫盡窠臼。而又嚴默邪妄詭誕。背聖真而流二氏之說。使學人曉然見聖賢之心。如日星之麗。天河之行地。而因以自見其心。原渾。

然。具。足。聖。賢。之。心。以。之。端。學。術。正。人。品。達。國。體。裕。經。
濟。舉。積。此。矣。將。來。教。化。蒸。蔚。風。俗。淳。茂。所。在。黎。民。無。
業。盜。賊。衰。止。俾。

聖天子收崇儒嚮學之明效而立臻郅隆者皆胡公造士力也嗚呼觀茲錄也乃見明體適用之學未有不知經傳爲何語身心性命爲何物而貿貿焉自誤誤人并誤天下國家者也然則世又何必以道學爲詎病哉

先生未嘗講學正使登壇者將下座避之

陳百史

先生評

周羹初撫東奏疏序

三韓周公撫山左之五載。化成績著聲赫中外。天子嘉焉。特簡公總制兩廣以行。仍敦趨

陞見否。決機宜。寵賚優隆。備彰異數。蓋深信公之撫東有成效也。先是金子嘗與公周旋禁苑。珥筆共事。恒服公之才品學識。足肩治平鉅任。今余退老田間。獲讀其撫東以來入

告之書。不覺擊節嘆曰。有是哉。我公治平之畧果于鎮撫。三齊窺其一班矣。殆如良醫治病。審察脉理。標本

虛實極其精細而又熟諳藥性之溫涼燥潤辛甘補
洩。狀後投以中病之劑未有不霍狀而起者也。大約
病在血脉者宜疏其窒滯養其筋骨而血脉暢矣。病
在元氣者宜補其虛耗填其精液而元氣充矣。病在
榮衛者宜除其客邪清其雜症而榮衛固矣。山左爲
神京左臂方二千餘里居南北要衝爲吳越閩甌豫章
百粵朝宗必經之道以言乎水則漕白之輸輶星羅槎
胥且之馳驟靡寧以言乎水則輪蹄之絡繹如織
使之帆檣櫓比調劑稍失其宜則盪戾梗阻害不勝。

窮此病之在血脉者當如何調劑也我公審知驛苦
于是乎有東省驛遞衝繁之議有敬陳整飭驛傳之
議有分路河南以恤民困之議有酌議東省分路之
法以蘇驛困之議有驛站需銀甚急請改解司庫之
議有請復驛道以重郵政之議凡此皆公之嘔心調
劑以治血脉之病者也東省地勢高亢恒苦雨澤愆
期早蝗肆虐一望蒿蕪民多十室九徒兼之于逆流
毒拋荒愈甚况差繁役重子遺之喘息奄奄莫支保
護一有未至則根虛易撼百患俱生此病之在元氣

者當如何保護也。我公審知民困。于是乎有安捕流
民。以資開墾之議。有請緩徵輸。以甦民困之議。有請
除開荒之限。以勵實效之議。有請復孤貧口糧舊額。
以恤無告之議。凡此皆公之加意保護。以治元氣之
病者也。青登萊福處海濱地。皆斥鹵。沿海窮民。皆以
網魚爲業。上完公賦。下活人口。自海禁一嚴。資生路
絕。兼之逃人伏藏。株連善類。投誠雜處。安插維艱。節
宣稍有未當。則外感橫侵。內症交作。此病之在榮衛。
者宜如何節宣也。我公目擊情形。殫精籌畫。于是乎

有青登萊三郡民困已極之議。有請輕逃人連坐之法。以免畏罪互隱之議。有密陳安插投誠官兵之議。有再陳安插投誠之議。有敬陳德州地糧之累。酌議變通之議。凡此皆公之按候節宣以治榮衛之病者也。至其他封章纍纍無不披丹瀝盡上弼。

君德下補吏治民生更有言人所不能言言人所不敢言關繫。

國家利弊興革之大者猗歟休哉卽賈長沙之治安。陸宣公之疏狀蔑以方其愷激婉摯已此皆公之才品。

學識蘊蓄有素而余固早窺之秘閣追隨之日者也。
語云治病需良醫治國需良相干公不信狀乎

大中丞韓公奏議序

大中丞韓公蒞吳之五載。輯其撫吳以來八告之奏議。書成。屬序於余。余喟然曰。今

天子簡命二三大臣。治平海內。亦求其真能任事而已。矣。雖然。苟非有高世之品之才。曠古之學之識。若燭照。數計于事之先者。罕能持大體。秉國是。批郤導窾。洞悉機宜。然後事舉功成。而民賴之。則又存乎真能議焉。故議者事之幾也。處乎任之先。則審理而不惑。處乎任之後。則責實以有成。古之大臣。歷禹臯周召。

而下炳炳烺烺。勲績紀太常。功名書竹帛者。指不勝數。莫不能任。亦莫不能議。書曰敷奏以言。明試以功。又曰爾有嘉謀嘉猷。則入告爾后于內。詩曰許謨定命。達猷辰告。文章政治。未有不合而用之者也。今韓公之來蒞我吳。已五載矣。先是公賦之急。莫知所緩。民困于徵輸。兵之所處。未之能戢。民苦于驛騷。萑苻滿境。消弭鮮術。刑法煩苛。清理靡由。秀民無以養。黠民無以懲。三吳財賦重地。幾于日見朘削。小民且莫措其手足矣。今公之來也。征徭之迫者紓矣。兵伍之

悍者馴矣。賊孽已靖。苛政已平。秀民咏其置。免黠民化其鳩形。公之能任固已見於設施徵于風俗。豈止澤一方。治一時。之任者耶。昔子輿氏謂伊尹任天下之重。而本于先知先覺。故能堯舜其君民。今公天民先覺之思。見于其書。其任大。故其思遠。其議高。以宏其任專。故其思一。其議精。以深其任切。故其思苦。其議婉。以長我。是以知公之能議。由于能任。所籌皆愛。恤民瘼之寔。亦惟能任。故復能議。所行皆精詳。至治之理。若夫百司之官。委以任者。不必責以議。飭其庶

職之當而已。責以議者未必畀以任。求其是非之辨而已。此非所以望於大臣也。大臣爲

天子股肱耳目之官。其輔翼勸相之精勤。旣足以開建太平。而拜稽陳謨之詳慎。尤足以廣敷弘業。是故旁作迂衡。則亦召之誥周之書。至其敷天時憇。猶然禹之冒言。臯之賡歌而已。區區賈生治安宣公奏議。又烏能比擬我韓公之一萬一哉。

自知錄序

余少時閱了凡袁先生功過格。竊慨然有省。已而讀雲棲大師自知錄。尤爲通身汗下。自知二字。洵提撕人心一項門針也。卽中庸之所謂獨君子之所必慎者。此也。蓋夫人一念之爲善。不必天知地知。鬼神知。然後降之以祥。而自知其爲善。則當念已。如景星慶雲。其祥莫有加焉者矣。一念之爲惡。不必天知地知。鬼神知。然後降之以殃。而自知其爲惡。則當念已。如山崩海立。其殃莫有甚焉者矣。嗚呼。人卽怠于爲善。

未有不願終日終身惟祥是集而殃之遠也。人卽敢于爲惡。未有不懼終日終身惟殃是招而祥之遠也。然則人苦不自知耳。苟自知則善者當益勉爲善。卽惡者亦無樂乎爲惡矣。胥天下之人而爭思遷善改過焉。皆程子載翼刊訂斯編廣行流布之力也。匪特重拈雲棲老人一片度世婆心抑亦我

聖朝明刑弼教移風易俗之一助也。尚斤斤于書功書過。惟感應是問乎哉。余是以樂爲之序而轉告夫讀是編者。

金華遊記序

金子曰士非近乎道者未可與語遊也嘗讀白樂天遊大林寺序云此地實匡廬第一境由驛路至山門曾無半日程自蕭魏李遊迨今垂二十年寂寥無繼來者嗟乎名利之誘人也如此以是知名勝之在天地間如清風明月處處有之人人得而有之而苟非近道之人則將終其身糾纏膠結于名場利窟靡他志亦靡暇晷能有天地間之所不禁人有者胡可得耶此魯論以樂山樂水獨歸之仁知良有以也太學

張子三省。積學好古士之近乎道者也。一日出笥中所携金華遊記示余。且告余曰。省自八歲渡楊子。從先人客白下。輒有志四方。旣而充邑弟子員。凡六蹶棘闈。自恨苟影蓬簷甕牖中。目圍未廣。學力未充。尚遠于聖賢之道。若遇合遲速。豈容心哉。于是聞婺州仙洞之勝。甲于東南。且多古今有道之士。遺風可挹。遂溯錢塘。歷桐江。偕二三同人往遊。因爲之記。以誌其勝。誠不敢負斯遊也。然未審果能不負斯遊否也。請先生一言正之。余夢想三洞。非朝夕矣。但未嘗曳

履其間亦烏能知子之果不負斯遊否耶。雖然余卒業茲記。觀子筆繪口吟若置我于圓暢樓中挹沈約諸人流風遺韻于千載之下而盡有全發勝概矣。謂子之不負斯遊可也。嗚呼向使張子以困阨諸生故一爲名利所誘其能有此遊否乎。故曰士非近道者未可與語遊也。然則張子從此道日益進則遊日益廣而該記特其嚆矢已耳。

作遊序者多矣點綴山川或有景色能如此有關繫否所謂言之合乎道也

陳百史先生評

吳羽三行稿序

嘗讀裴度寄李翹書云文之異在氣格之高下思致之深淺不在於磔裂章句。隳廢聲韻也人之異在風神之清濁心志之通塞不在于倒置眉目反易冠帶也。旨哉言乎文之所以不求異而自異者其胸中未有不包絡今古涵濡經籍而能聳氣格于齊漢之間窮思致于幽淵之境夐然振拔于流俗之靡靡者也。余闡中得吳子羽三卷見其格勁思深尋常尺幅間饒有異境當是力學嗜古之士及撤闡而後知羽三

名噪海內久矣。幼警慧目，十行下年。甫十二卽能爲古今文頡頏名流。遇有忠孝節義之事，卽咨嗟慨慕爲之感賦流連。歷落動人。弱冠登賢書，復困躡十餘年而始獲應運昌期。噫！宜其學日益邃，識日益老。文不求異，而自異也。雖然，余不獨賞其文也。羽三才智，焜耀爲英絕領袖。顧其爲人，恂恂訥訥，笑語不苟，跬步必謹。是殆性近于道于人世，一切矜艷浮靡移情蕩志之習似能澹然忘懷者歟？將來潔身牧民，仰副聖天子惠愛元元，寤寐賢良之至意。吾知羽三其必有

合也。然則律以今日之選格，雖發軔百里乎？他日事功之所成就，正未可量也已。余因序其行稿而併期之如此。

丁飛濤行稿序

昔人謂韓退之以文爲詩。杜少陵以詩爲文。然文中
要自有詩。詩中要自有文。亦相生法也。謝元暉曰。好
詩圓美流暢如彈丸。此所謂詩中有文也。唐子西曰。
古人雖不用偶儼而散句之中暗有聲調步驟馳騁
自諸節奏。此所謂文中。有詩也。余讀丁子飛濤闡中
卷雅藻綴紛風華掩映。具有一往情深纏綿無已之
致。而格律森然麗而不靡。宕而有則。其殆文中。有詩
者乎。比撤棘乃知西陵之有丁子。其上淹三古下籠

百氏橫行濶視于綴述之場者。非一日矣。因縱觀其生平所爲文。併所著風雅體樂府歌辭。及古律五七言諸什。而後歎昔人論詩文有相生之法。于丁子益信然。今其文其詩並行于世。謂文中有詩可謂詩中。有文可雖然。天地間江山靈秀之氣。蒸動磅礴于才人文士之筆端。而有詩文靈氣無盡境。則詩文亦無盡境也。躋其巔造其極。合韓杜而一之。余于丁子。有厚期焉。若區區制舉業。又烏足以張我丁子哉。

王氏家譜序

大宗伯敬齋王公輯王氏家譜成。特持以示余。屬爲之序。余讀而歎曰。有是哉。王公之爲秩宗也。能修明其禮于朝。著之間以之立綱陳紀。翊景運之休。隆而復敦厚其禮于家庭之内。于焉礪俗維風。直欲挽叔季爲淳古也。請得而申言之。粵稽氏族者。古史官之所記也。漢司馬遷約世本修史記。因周譜明世家。人乃知姓氏所由出。終漢之世。有鄧氏官譜。應劭氏族篇。王符姓氏論。唐有貞觀氏族志。元和姓纂。路敬淳

姓畧。柳冲族姓系錄。宋廬陵歐陽氏。則法史氏年表爲歐陽氏譜。眉山蘇氏。則法禮家宗圖爲蘇氏譜。當世之學士大夫。靡不留意姓氏之學。故一家之人。尊卑疏戚。井井秩秩。咸知肅焉以相敬。藹焉以相愛。愛敬篤而禮教興。其所裨風俗。世道豈淺鮮哉。乃由古之道。以觀今之族。不無深可太息者。或矜尚門第。託附名家。則假借異代。遠不可知之苗裔。而拜他人祠墓。亂自己宗支。恬不爲怪。此則世系之不明也。或宗派既淆。名稱易混。則有卑犯尊諱之謬。有支庶奪嫡。

之嫌。至生卒年月亦多遺漏舛錯。數傳以後。便漫無可攷。此則名紀之不晰也。或務飾聲華。焜耀簡編于事實。不無乖離。則一人之本末。容有未詳。子孫之暗記。半屬影響。偶回護細行于一時。反掩生平大節于奕世。此則傳誌之不核也。或詳內傳而畧外紀。則女之有家者。一適異姓。藐隔同氣。鮮不因時勢之遷改。門祚之旺衰。爲情意厚薄。以致漸疎漸遠。且甚而相暱。毗鬪。竟忘其木本水源。從先人之一體而分此。則外傳之不立也。王公怒焉慮之。蒐輯家乘。志在

復古而譜法于是大備焉其首之以譜序也明譜之所由作欲後之人知其所本而油然生尊祖敬宗睦族之心也其次之以例義也一曰世系重其世之有可攷三世以上遠而無徵者不妄附也一曰名紀晰其名號子女生卒配媵併葬域所在粲如列眉貫如縣柬繁稱而無當者不以贅也一曰內傳自王夫父母以下凡沒者生平遺行潛德徽猷暨夫閭則婦儀必詳著本末期于核實寧直無誇稍忌而有所飾者弗之取也一曰外傳女子生而有家則必書其所適

之姓氏。縱時勢遞遷。炎涼屢易。俾子若孫。猶得循流溯源。合異姓爲同氣。不至若秦越人休戚罔關。而有垂親親之誼也。然則王公之爲斯譜也。其真得往古宗法之遺意。而先王之禮以之治天下者。未始不行之一家矣。昔歐陽公見蘇氏譜而歎曰。是不可使獨我二人爲之。將天下舉不可無也。余于王氏譜亦云。嗚呼。當今之能世其家者。寧有若任丘王氏者哉。非以兩贈君而下方伯公父子祖孫。後先鵠起成進士。又一門兩大宗伯。同朝同時。俱赫然負公輔碩望。爲

能世其家而雙槐公之泊然世味棲神竺典蹠還遺
金引避詬署其千古高風遐軌越數傳罔替而厥後
益祇紹光大焉此之謂能世其家也蓋非世其功名
爵祿之謂而世其道德仁義之謂也漢袁楊之四世
五公晉王謝之百世卿族方之未足多矣余是以奮
筆樂道而爲之序

木香張氏族譜序

方正學先生曰。古之貴乎修譜者。非特以著世次。紀官位。而誇于人也。蓋將使後世觀之。而攷世德之淳疵。明流澤之廣狹。而益思所以自立云。爾吾觀木香張氏族譜。其殆有合于古之修譜者也。張氏先世名允者。仕吳爲東曹掾。輕財重士。名顯州郡。我吳之有張氏。自是始。允九世孫廷傑。宋紹興年間。爲靖州推官。未幾乞休。笑傲泉石。耽嗜花木。宦橐蕭然。僅得所愛木香樹以歸。傑五世孫士能。名恒。遊震澤。旗學有

文名麟室。讀書追念先人手澤移植木香于庭。張氏之以木香名。自是始。先是元泰定年間。族人士弘。登第仕監察御史。有風力。與撒里不花仝上疏。言事切直。至正年間。士堅又登進士。授翰林編修。士能亦相繼以明經授江淮財賦提舉司。旋以省侍歸老。清風介節。振薄林臯。門人私謚之爲文清。第六世孫賦溪公。源中明嘉靖壬午應天鄉試。出中峰董先生之門。屢黜南宮。除寧波府別駕。廉能有聲。以江陵立朝致仕。歸安貧樂道。日以詩酒自娛。念枝族繁盛。恐散遠。

不能聯絡立木香義會。每歲三月朔祭畢。則燕初舉。
會時當祭之頃。花方蓋及燕。則花忽盛開。里中父老。
咸以爲和氣所感。一時名公鉅卿。迭有唱和。以歎美。
其事。木香張氏之號。因而大著。又自是始。後賦溪聞。
世廟升遐。一慟而絕。學使者楚侗耿公嘉其忠耿。命
所司崇祀鄉賢。第八世孫見源公。夢禎遊烏程。庠名。
噪浙東西。以孝友端方爲時所重。平居一言一動。悉。
繼祖武。木香祠之輪奐久而彌新。則又惟見源是賴。
焉。嗚呼。自吳迄今千餘年來。其子孫嗣詩書禮樂之。

傳勿之有替。又代有碩德。後先相照。覽斯譜者。可以
想見其世德之淳流。澤之廣。非若他望族之所爲譜。
僅以著世次。紀官位。誇于人而已也。九世孫繼芳公。
潤篤學。敦行克紹先業。慨然欲並士能賦溪見源三。
先生而爲四子焉。合離萃湧。修廢舉墜。思有以益永
木香張氏之號。而屬序于余。余家與張氏世同里。同
學得之。聞且見者。頗能詳其世系。及其仕宦之蹟。與
文學之名。故不獲辭而爲之序。

初讀之序。次張氏平平無奇耳。歷年前後文學仕

宦一絲不亂一語不妄此古文之奇合者不知此
之爲奇而耑以字句不可讀爲奇所謂腐木不可
以發聲音也惟吾友能自得之

陳百史先生評

是本氏譜不可那移而文境愈澹愈老

孫北海先

生評

乾坤法象序

松陵徐子宿南以堪輿名家。人與遊者。莫不服其言。論以爲深得曾楊廖賴之秘。徵驗若神。一時三吳士大夫咸推青鳥家。有松陵徐宿南云。時過吳門。與余孫乘樸善。余讀其書而奇之。因與之言曰。堪輿儒者。事也。盈天地間莫非一氣。有氣則有理。有理則有數。有數則有形。於是太極不得不分爲陰陽。陰陽不得不不分爲動靜。動靜不得不消爲萬象。象昭而形判焉。今觀徐子之書。上推乾象。而星辰之遲留伏逆。天官。

類也。下衍坤輿而山川之昂俛聚散。九丘理也。及于十二律之相成。八音之吞吐。黃鐘蘊也。八卦之易位。元會之推遷。河洛義也。真儒學之精且備者矣。夫士而無學。則不能審理以命數。察氣以辨形。而况乎地勢之廻合。風氣之轉移。起伏屈伸。變化莫測者乎。今徐子之學若此。以之審察陰陽。分別休咎。論氣則風霆雨露。不能易其常矣。論理則進退衰旺。不能愆其則矣。而且吉凶禍福。兆乎數。以抉天地之奧。向背得失。著乎形。以揆人事之變。宜乎徐子之學。非近時形。

家者流也。且聞徐子性至孝。昔爲兩親卜善兆。曾遇異人授異書。研究三十餘年。遂精其學至此。豈偶然哉。今其書具在。凡爲仁人孝子者。家置一冊可也。余是以樂爲之序。

蘇州太守吳瑤如公祖去思詩文集序

去思之發爲詩歌也。殆原本三百篇矣。甘棠蔽芾之詞。九罭鱣鯀之咏。其千古去思之祖乎。蓋思生于去如儀。思食寒思衣。有非可以強徵而倖致也。凡在位者之方吏茲土。也可以于譽于其上。可以市美于其下。非不令皆卓魯。守盡龔黃。及乎解組謝事。而後羣情之真向背。出焉地方之公是非。亦始定焉。自非德意及民。淪肌浹髓。而欲人懷借寇之思。家深挽鄧之志。美召伯之菱。憇眷姬公之繡裳。留連歌咏。而不能。

已已其烏可得耶。吾郡吳公祖瑞翁由名進士起家
邑長以廉幹奏最入爲儀部聲名冠曹署間。

今上康熙二年由郎官出守吾郡閱五載而去一時士
民攀戀之情不啻嬰兒中道失其慈母歎歎慨慕遠
邇一揆未幾而詩譜洋洋哀集遂得若干余讀而歎
曰有是哉此可以見吳公政治之得民者深而凡士
君子之出而爲世用者當無疑乎道之不可行而民
之不易治也蘇固劇郡財賦甲天下俗多鉅猾吏善
舞文又地當三吳要衝過客往來應接不暇以故長

才恒苦棘手。公下車來。清風兩袖一惟齋易享。靜爲治。請謁不行。催科不擾。廷鮮朴責。鄉無夜呼。緣屬抱牘。欲上下其手。不可得。遊客至止。將有所謁。輒飲以醇酒。相與談山川風物及民生瘠薄之苦。客往往銜杯意沮。卒不能發一言而去。嗚呼。在昔周公之論治也。曰平易近民。民必歸之。而漢人之歌蕭規曹隨也。曰載其清靜。民以寧。一其咎。吾之謂歟。去思之歌與甘棠九嚴之什。今背比隆誠宜也哉。夫俗吏旣難與道古。而一二有志自好者。又每憲世網拘牽不克。

徑行其意。且以民之無良難乎爲上。而由今觀之。吳公之治效如是。吳民之歸嚮如是。其亦可油然而興起也。夫遂書此以弁其集。并識穿繙衣之好。暨直道之斯民。萬日一心。俾後之觀風者。庶有所攷焉。

金文蘊公集卷之二終

金文通公集卷之三目錄

吳江金之俊豈凡著

賀大宗伯素菴陳公大拜序

賀學士清遠王公總裁春闈序

賀學士彥升陳公副纂修總裁序

賀大司農党公嗣君高捷序

遜學士劉公總督浙閩序

送侍御雪園王公巡按上江序

送侍御弼廷王公巡按下江序

送侍御渡涯趙公巡按兩浙序

送總戎子淵馮公節鎮嘉禾序

送少叅仲趙郝公備兵安徽序

送太守楊君錫之任濟南序

送大司農党公致政序

金文通公集卷之三

吳江金之俊豈凡著

賀大宗伯素菴陳公大拜序

今上御極之九年。特簡大宗伯素菴陳公。晉陟端揆。維時朝列諸親。知謀爲文。以賀之。而屬余言。余雖不文。竊與公從遊久。固素知公者。其曷能已于言也。按輔弼之義。書載之詳矣。日予違汝弼。日夢帝賚予良弼。

曰汝受命篤弼。曰弼予一人。曰弼亮四世。曰永弼。乃后于羹憲。自皇夔以至房魏。凡名相臣之歷歷可數者。其所遭之時不同。所樹之助業不同。大約出入諮詢。言動獻替皆能致君于無過。措國家于不傾。未有不協于弼之義者也。我

皇上入主函夏。九載于茲。海寓號稱混一。開闢鴻模。方古爲烈。乃荒服尚有未賓。思所以來之。兆民尚多失業。思所以安之。五刑未措。欺詐日生。思所以釐之。六氣不和。灾害洊至。思所以禳之。

上因諭諸臣曰朕勵精圖治日求天下太平切望內外諸大臣盡心竭力以匡不逮顧宰相職專輔弼非内外諸大臣比尤

上所注意而倚畀更殷者公遂以宗伯爰立入相先是朝局波濤因而齶齧及公幾罹不測

上卒自之不爲所撓良以公典秩宗時寅清直亮諸凡郊祀臨御大典酌古準今悉本掌故爲之因革其間制作燦然明備不待百年而禮樂遂興以之平章軍國黼黻絲綸非公不可公一入政府凡所以講求治理

振飭紀綱與夫愛養人材扶植善類種種殫竭謀猷
動中肯綮中外之人無論識與不識皆得而見公之
學問才品不愧古名宰輔至于遇大事決大議爲世
道治亂所係

君德損益所關小臣不敢言大臣不能言疎遠之臣不
敢言親近之臣不能言者公爲之隨事納忠嘿効啓
沃俾一時傳之四方朝無闕政他日書之史冊

君無過舉此皆外廷所不能知公亦絕口不以語人嗚
呼揆之書傳輔弼之義公真可謂無忝也已然則未

賓之荒服。將稽穎恐後。失業之兆。民將歌舞更生。而
圜扉自是無冤獄。陰陽自是無沴戾。人事修于下天。
心順于上。天下太平。可以立見。庶幾仰副我勵精圖。
治之。

聖主哉。是何可不爲公賀也。請率諸君子共起而執爵
以進。

篇法暗用退之上宰相書一反一正近日名手未
能窺見

陳百史先生評

賀學士清遠王公總裁春闈序

昔張方平知貢舉。言文章之變與政通。士惟道義積于中。英華發于外。以文取士。所以叩諸外而質其中之蘊也。言而不度。則何觀焉。歐陽修知貢舉。以士習奇僻險怪之文。鉤章棘句。寢失渾淳爲患。痛裁抑之。卽才如劉幾。亦置弗收。自是文體一變。士皆務實用。以爲學本性道。以爲文而不爲無益之空言。甚矣。主司之選。貴得其人也。

今上御極之六年。歲己丑。復當南宮較士。先是

上。愈輔臣。請詔飭文體。良以四方眷眷。多故。皆由人心不正。而人心頗僻于文詞。見之。故告誠凜凜。旣慎選主司。分較省直。尤鄭重禮闈。

特命學士清遠王公。貳諸輔臣。主闈事。必訥有加。試榜出凡離經蔑誣。沿習詭靡。爲流俗所推譽者。皆不在選。一時翕然號稱得人。于是浙紳士之在朝者。咸舉手加額而相告曰。王公之得人。若此邦家之光。抑梓里之榮也。屬構李金子爲之言。以賀曰。士踵明季之陋。陂詞邪說之浸淫。蓋有年矣。今多士。遽舍故步。而

從王司一日之約。悉返雅醇。卽張方平歐陽修之爲貢舉。寧有加焉。噫。此操何道以得之歟。則王公之家學淵源。所以繩多士者。非自今日始也。昔王文成先生嘗王東省試爲弘治甲子得人最盛。其言曰。夫子之鄉。固平日所願一至焉者。而乃得以盡觀其所謂賢士者之文。而考校之。豈非生平之大幸。雖然亦竊有大懼焉。吾觀王公駁歷中外。于經營禍亂之餘。蒿目世道久矣。瞿然懷文成之懼心。以杜諸士生心害政之原。而士之懼叛聖賢。而寧平母詭懼于功令。而

寧質毋華者。烏得不入其網羅也哉。由此正文體以正人心。正人心以正風俗。四方削平可幾之。尺幅間矣。宜乎。

聖明之不以文教後。武功而加意王司之選。有如此也。然則吾儕非獨爲王公賀。將以爲天下賀也夫。

援古証今有此事。卽應有此文。近讀虞伯生集。頗願爲執鞭。當世雁行。獨有先生耳。

陳百史先生評

賀學士彥升陳公副纂修總裁序

昔李鄴論漢書。謂西漢十一帝。高祖起布衣。定天下。豁達大度。東漢所不及。其餘惟文宣二帝爲優。自惠景以下。亦不皆明于東漢章明兩帝。而前漢事迹灼然在人口者。以司馬遷班固叙述高簡之工。故學者悅而習焉。其讀之詳也。然則載筆一官君德。政治因之。而抑揚往行。前言藉是以顯晦。其所關顧。不鉅哉。學士彥升陳公直亮洽聞。具良史才。

新朝聿興。取鏡往代。命輔臣某。某充總裁官。修明史。而

陳公爲之貳焉。余於是仰見。

朝廷鄭重史事。慎簡史官。而竊幸明史之有托也。以學如陳公。辭如陳公。忠厚正直如陳公。而使之奮筆領袖。必能爲子長孟堅之敘述。俾前代事迹灼然可觀。豈遜西漢一書哉。且余聞之。爲史官者。明不顧刑辟。幽不見神怪。無所梗避于其間。而後其書可貴。今明代二百七十餘年。一切理亂得失。貞邪善惡可則。可鑑。可勸。可懲之事。具載實錄。昭然難掩。陳公生值明季。猶及見當時之人。聞當時之事。旣不若劉子玄所

云左右二史缺注起居衣冠百家罕通行狀之難憑而據事考跡爲之表直骨于枯墳繙詔魄于下泉又非有孫盛實錄取嫉權門王韶直書見讐貴族之可慮用宣尼褒貶之心存萬世是非之公傳信傳著一如春秋更有何便避于其間哉將來橐筆告成事而艷稱一代良史古又不徒以其敘述之工與子長孟堅同日而譖矣余是以嘆

朝廷之鄭重史事慎簡史官而深幸夫明史之有托也故喜而爲之序

昔讀茅鹿門先生與吾邑馬孟河先生論史書以
爲韓柳再見若如此贈序立言重遠真可並傳豈
凡於鹿門爲外孫淵源自在文章也

陳百史先生評

賀大司農黨公嗣君高捷序

歲辛卯。天下大比士于鄉。秦中錄至大司農于姜党。公嗣君。哀列賢書。維時大江以南。諸縉紳之仕于朝者。咸手額稱慶。謀爲文以賀之。客問余曰。曷爲乎。秦士舉而吳紳喜也。余曰。此以見吳人之德公。而公自大司寇。晉典國計以來。所以仰承。

聖天子嘉惠東南。哀閔元元之盛心。其爲德于吳者。蓋有未易殫述也。他不具論。論其大者三。吳賦稅甲天下。民力之困于輸輶。所由來矣。比值兵燹之餘。瑣尾

流離未有起色而時方有事南征師徒絡繹舟車芻
秣悉索以供又不幸歲罹奇灾吳民幾魚數百萬之
漕糈且將舉而問諸水濱焉不徵則病國徵之則病
民民病而國亦還以病公慨然曰

聖天子以愛民爲主吾忝司計豈可以病民者病國耶
于是朝思夕慮嘔心籌畫于其間欲使公私兩利計
莫若從改折一議而公又未得以便宜行也反覆諮詢
如一身一家痛心切骨事至于嗚咽流涕卒之積
誠感動一時共事諸君同心協贊因條上改折議乃

得

講令下之日。懼聲動地。卽此一端。公之德于吳者。何如。
而吳人之德公者。又宜何如也。嗚呼。公豈真有私于
我吳哉。祗念東南諸郡爲。

朝廷根本重地。須加寬恤。以裕億萬斯年。惟正之供。古
大臣公忠體國。道自應爾。顧大浸稽天。斗粟千錢。之
歲。得留有限之粟。便可活無窮之命。卽謂公之有私。
于我吳可也。秦士舉而吳紳喜。端有以也。雖然。嗣君
之鵬奮鶻起。佇冠南宮。此直公誦讀淵源。義方家訓。

有以致之。豈遂足以稱公之食報于後昆而吳人之沐浴休澤爲之家戶。戶視者亦豈僅止此而已哉。將來嗣君克紹箕裘志澤天下必一如公今日者之爲德于吳與夫吳人之德公是則我儕之可爲公賀者已。

得大體結構以平而奇今日晉江也

陳百史先生評

送學士劉公總督浙閩序

今上御極之九年壬辰九月主爵者集九列三事大夫廷推浙閩總督咸云兩浙係財賦重地雖底定有年湯火遺黎膏竭徵輸萑苻處處竊發綏戢非易至八閩三山之間一二逋誅海寇尚逆我顏行肆掠郡邑時方大用兵須鄭重厥選于是衆論反覆咨諛以學士劉公貳焉念公係文學侍從之臣

聖天子方親圖史咨啓沃斯須不離左右恐未便以疆場之故煩儒臣以軍旅故姑以貳請

上乃深知公者曰近得邊吏報

朕方切南顧憂茲任非某不可遂特簡公維兩浙紳士之在朝者爭舉手加額一以爲大夫亦知

宗社慶一以爲桑梓慶而屬余執爵贈公之行余曰諸

上意所以簡公者以文德不以武功耶余請得而申言之然後執爵以進可乎吾浙民不聊生其困有三一困于賦稅賦額本重惟正之供恒苦不給而又加之以師徒往來悉索芻秣且奸胥之漁獵無已墨吏之

誅求無端。水旱爲灾。猶其小者耳。民困一也。再困于盜賊。所在不逞之徒。嘯聚爲虐。本一捕卒之力。可以制其亥命。而有司競亟催科。不暇問。大吏左右。偏多窟穴。不能問以致白晝刦殺。質人勒贖。公行無忌。筭槩子遺。旣供

國稅。又資盜糧。民困二也。三困于官兵。官兵之設。本以禦盜安民。而近且有占民房。索民食。通盜線。利益賊民之苦。兵甚于苦盜。相率吞聲。莫敢控訴。民困三也。此三困者。惟文德可以除之。不必以武功見也。若夫

閩越近日之爲患。則海上偷息之渠逆。鯨吹鼉激。漳泉一帶方切鼎沸。計非大用兵。以滅此朝食不可。然有名之寇。要領在我布。

聖武不殺之恩貳而討之。服而舍之一紙書。賢于十萬師。僅在指顧間。則閩越之敉寧亦惟文德可以致之。似不必勤兵糜餉以武功見也。故曰。

上乃深知公者。

上意之所以簡公。以文德不以武功也。古所云有安社稷臣者。舍公文學侍從之臣而又奚屬哉。諸大夫曰。

唯唯請執爵以贈公行

茲在非劉公不可語朴而文如子固制辭

陳百史先生評

卽於贈劉公行指陳情形數千百言不能盡者以
數十言該之可謂腕中有長房縮地法矣邵立泉
作文每寄天涯相公輒抹數行如先生文簡而有
法者正自難得柳子厚曰讀吾文而以爲簡者必
不知文者也知文者必貴簡矣

又評

送侍御雪園王公巡按上江序

上御極之五年春視上江使者告代御史臺請以雪園王公往

制曰可先是公嘗按兩浙矣時錢塘以西初入版圖江東猶抗未下人心風鶴凡官其地者一聞除命輒色沮公獨奮然叱馭比至則集流亡招攜貳收拾士心和諧將吏日孜孜不暇會大兵渡江東一切舟車芻秣供輸靡悞民皆不知而公則嘔盡心血矣未幾東漸悉平雖曰師武臣力哉公之功不可泯也公報竣

還浙之士民如赤子之脫慈母之懷繡衣使者不以霜雪示威而以雨露見德于王公僅見之

朝廷嘉公視浙有成效。睠茲長江之上流方眷眷多故非公往視之不可故又有是

命江南士大夫之在朝者咸舉手加額而慶曰吾鄉之徽寧廣德與浙壤齒民情土俗俱不相遠公之有德于浙者如此其甚厚則江干小民之又將沐其雨露也豈願問哉余越人也而吳籍也旣嗟其去何速復訝其來何暮而又幸公之來我上江也猶之乎未去

兩浙也。然則余之私慶于心而懷思不已。舞蹈難名。較之江南諸大夫。而殆有甚焉者矣。其何能已于言。不以頌而以規。文家占地步法。此則卽用頌爲規也。文至此必傳。陳百史先生語

送侍御弼廷王公巡按下江序

嘗讀漢武帝遣博士循行詔。有曰。仁行而從善。義立則俗易。意奉憲者所以導之未明歟。將百姓所安殊路而擣虔吏。因乘勢以侵蒸庶耶。何紛然其擾也。余因是而想見古者循行之遣。蓋慮爲吏者之擾吾民而貴有以安之耳。長江上下。秉鐵彈壓者爲御史中丞。歲奉

璽書。分道循行者爲上下江兩御史。下江轄蘇松常鎮等郡。連海濱湖。素爲萑苻出沒之藪。且賦稅繁重。習

俗侈靡其地雖號富饒民多貧困年來旣罹兵燹又兼吳中水利久廢旱澇頻仍而徭役不減俗侈更甚且不能保無侵之者居于其上則下江一帶亦旣紛然其擾矣安之者惟循行之使是賴今侍御弼廷王公乘驄往視而余與公部下諸士紳交口稱慶曰幸哉江民可無憂紛擾也已何也公在前朝起家邑宰初任汜水中州士民至今德之不衰再補順義北地亦德如中州詢其故咸以我公仁能導善義能易俗故所在著聲所去見思茲且懷仁秉義居高而唱以

稱

新朝特簡循行之舉。視此兵燹餘黎。有不講求蘇息而使鴻雁來綏。鯨鯢屏息者歟。澤國恒遭旱澇。有不亟議修復水利者歟。蘇長公所進單鍔吳中水利書狀。以捍禦灾患者歟。有不憐重役懲侈俗糾察侵吏而霜雪雨露之兼施。使吳民尸祝不忘其功德之大且遠。更有加于中州北地者歟。故曰幸哉江民可無憂紛擾也已。請酌而祖公行可乎。

王李集中多贈侍御文能如此真切有關係否。讀

者勿貴耳而賤目也

陳百史先生評

送侍御護涯趙公巡按兩浙序

順治五年歲在戊子夏四月侍御趙公護涯奉

璽書按部兩浙比秦之士大夫在朝者咸咨嗟嘆賞而相與語曰是嘗按我三秦端方耿潔一時僚屬對之者如嚴師之立于其前凜不可犯而及其惠愛小民則無所不至又如慈母之置赤子于其懷幸矣我秦人之蒙其休澤者方戶祝于無窮也而浙之人抑又何幸耶舉朝薦紳又相與交口而誦曰星有執法職有持憲鐵冠繡衣直指不阿俾在位者肅如惟趙公

按秦有焉嘗讀其一二封事凜然生風宜其問豺狼
綏鴻雁解墨吏之綬憚流孽之魄調劑滿漢兵民間
使之各安其所而爲秦人之所畏而感感而泣泣而
繼以思者至于此也今

聖天子惠顧東南又移執法于斗之野耶于是浙之剖
氓聞公之見思于秦者若此見公之推重于舉朝者
若此爭酌而祝曰公之往視我漸也有不令官于其
上者憚若嚴師與袵席于其宇下者戴若慈母歟豺
狼敢橫于當道鴻雁尚哀于中澤歟墨吏不望風而

退。濱海陬之一二遺孽不屏氣憊息革面革心之
恐後歟。目今往鎮吳越之大兵尚慮其調劑未當致
主客有不相安而市或止耘或變歟。某聞言亦執爵
而進曰。是真我浙西東億萬生靈之福也。請述其言
以祖公行。

一開一闔前後容與與韓吏部上宰相書同法

陳彦升

百史先生評

未入浙頃之難爲浙人規之難實而虛虛而實極
文心之妙

陳彦升先生評

送總戎子淵馮公節鎮嘉禾序

從來親民之官莫如守令。察吏安民之官莫如撫按。乃若職司不與守令等。事權不與撫按侔。而能爲撫按。守令之所欲爲而不得爲。以禁除民害。嘉惠元元。使小民之愛戴而尸祝之。曾不減于召父杜母。則莫如今日江浙諸郡特設分鎮之大帥是也。

朝廷開鎮列城之意。原以安民。非耑以禦盜。得其人。則化盜爲民。必不驅民爲盜。不得其人。則以之禦盜。不足以。而民不安。以之擾民。有餘而盜益熾。其所關地方。

之安危。民生之休戚。豈細故哉。涿鹿馮公子淵以侍衛親臣特膺

簡命往鎮浙之禾郡。是能爲撫按守令之所欲爲。而不
得爲者矣。可爲

朝廷賀可爲地方賀也。請試言之。我禾西接杭湖。北聯蘇松。自慘罹兵燹之餘。幾于城郭烟銷。村墟鳥散。邇者雖化離漸集。元氣稍甦。然促耕猶不足以療饑疾蠶。猶不足以救寒。况夫湖濱海畔。遺孽未靖。兼之師徒往來。征繕弗給。倘又加之以統軍者。律已不嚴。馭

卒無法盜。未憚息民。已脧膏其爲擾。我耕妨我織者。
正未有已也。欲禾民之不饑。不寒。胡可得耶。饑寒切。
身而欲禁其不爲盜。又胡可得耶。我馮公以詩書之。
胄。擅戎馬之長。馭兵恤民。講求者素。曩在前朝。專閫
雲中。理屯考最。繼又領幕中樞。節制有聲。今且荷。

新朝之寵眷。抒侍從之忠猷。一蒞其境。必惻然念我禾
民。兵燹餘生之苦。驚心草澤之苦。與夫奔命征繕之
苦。飲恨騎兵之苦。爲之釋其苦。而予以甘以仰副。
朝廷設鎮安民之意。當無所不至。將見禾民有不必盡。

耕而飽不必盡蠶而煖者矣而又何盜之足慮也故曰馮公之鎮我禾郡能爲撫按守令之所欲爲而不得爲可爲

朝廷賀可爲地方賀者此也某也敢用此贈行以當禾民來暮之歌云

文至文武互用方是經濟

陳百史先生評

送少叅仲趙郝公備兵安徽序

嘗聞歐陽永叔云。漢之政理文章。後世莫及。良以時多通經學古之儒。其名位利祿之念不動于中。而于墳典丘索。罔弗探其源。涉其流。故其發爲文詞。見于行事。皆炳然可觀。以余觀于仲趙郝公。而竊嘆古今人未始不相及也。郝公爲關中名雋。好古力學。有文章之譽。比及筮仕。而志益奮。業益勤。其居諫垣三載。正直不阿。然未嘗徒以言論博風采。每于出入禁闈之餘。網羅羣籍。搜抉奇句。孜孜不倦。有如饑渴之于

飲食意冲然忘其爲諫垣也。今一旦循例出叅外藩。
備兵安徽在恒情較量于内外勞逸間未必不怏怏
志歎而公復處之恬然向使公之好學未篤識力未
充當其爲

天子耳目之司誰能禁其以風采自見而不至以訐爲
直及其輶侍從就外僚則又烏能強之矯情鎮俗而
恬然不異其爲諫垣時也此非所謂通經學古之儒
舉一切名利祿位之念毫不動于其中而能若是耶
茲者江州新安一帶地方尚蠢蠢未靖豈武備之或

弛歟抑文教之不足歟。語云移風易俗使天下同心。
鄉道類非俗吏之所能爲也。以學有本原如郝公者。
爲之秉憲而專制我知其治民則惠。馭吏則肅。詰兵
則靜。明刑則勅。彼蠹蠭者有不回心鄉道而金陵上
游將從此屹若金湯已。安在公之政理文章炳然可
觀。稍遜于兩漢之學者也哉。嗚呼甚矣。學之不可以
已也。

中見小結前起無一不相應語爲學道人占地步

陳百史先生評

送太守楊君錫之任濟南序

古來循吏之稱見于紀載者莫盛于漢。嘗讀漢景帝令二千石修職詔有曰：饑寒並至而能亡爲非者寡矣。其令二千石各修其職不事官職耗亂者丞相以聞。漢之加意二千石若此宜其多以循吏稱也。當時最著者黃穎川龔渤海考黃次公爲穎川宣布詔令令民皆知上意以寬和爲名。龔少卿爲渤海悉罷逐捕盜賊吏非使勝之將安之也。兩公治行皆稱第一云然則以苛爲察以刻爲明非所以撫民亦非所以

禦盜也。

今上加意吏治。勑守令親民之官。非三年考滿不得遷。
大哉。

王言逾于漢詔。而小民似尚未曉然知。

上意之寬和。所在盜賊蜂起。亦未得以安之爲勝之之
法。豈滿漢諸臣中。遂鮮穎川渤海其人。以上應

勅旨歟。抑有其人焉。而未與二千石之選歟。以余觀于
今濟南太守楊君君錫。殆其人也。已君錫係

朝廷舊人子弟。起家文學。以才望簡授今官。將之任特

過余請益。且其所自矢者。誓必潔已愛民。不任左右。
不縱兵丁。不畏權勢。務使化盜爲民。斷不逼民爲盜。
余曰。君之自矢者。察而不苛。明而不刻。則已盡爲太
守之道矣。盡今日所以守濟南之道矣。不負。

朝廷之特爲選擇而使矣。余更何以益君哉。君之往也。
但如黃次公之宣布詔令。令民皆知。

上意一本寬和。但如龔少卿之不期于悉捕盜賊。期于
計安窮民。則舉東土數十年來兵燹憔悴之遺黎。一
旦與之更生。攘臂揭竿之餘孽。不難盡爲向化。卽古

良二千石蔑有加焉而余又何以益君哉嗚呼君行
矣其慎毋忘今日所自矢則寧獨以之守一郡而有
餘也耶余于君更有厚期焉

如此等文直可壽千年矣發金石之聲潤風雲之
色不如此文之有聲色也

陳百史先生評

送党大司農致政序

順治九年冬十月大司農于姜党公再疏請告上許之且

天語褒嘉恩禮優渥一時艷稱盛事于是朝列諸卿士大夫爭爲詩歌文辭相倡和以歎美之有援漢二疏之辭位而去並張其賢者有述韓吏部爲文送楊少尹云古今人未始不相及者又有謂二疏時近古難進易退非甚高行公嘗習俗競功名之時而飄然遠引比二疏爲尤難者又有謂楊巨源官不過國子司

業卽去不甚關輕重。公保傅大臣。典國計于肇造之初。兵革未罷轉餉方殷。

聖天子何如倚毘而卒不能奪公去志。使今日韓吏部而在爲文以寵其行。又不止如楊少尹而已者。若是乎居今之世處公之地而決志以去。公誠不可及哉。金子曰。公之不可及。不于其去之日也。于其留之日而常懷去之志。不肯隨時俛仰碌碌苟容爲不可及也。先是公爲司寇時。令其子孝廉君構一山居。顏之日意先有亭有橋有泉有洞。皆以意先名。蓋身未至。

而意已先之。余曾爲公作意先居訖。然則公之芥視功名。敝屣富貴。豈在今日耶。故存是意。而爲司寇。則必欲爲人主。廣好生之仁。若使峻法以戕命。身可去也。法不可峻也。存是意。而爲司農。則必欲爲人主。布愛民之澤。若使損下以益上。身可去也。下不可損也。宜公之司刑。則活人無算。司計。則惠民無窮。倘稍有榮貴利達之心。攫于其中。則惟恐活一人。而拂某。某惠一民。而拂某。某其徘徊瞻顧。依阿淟涊。忍之狀。且有不堪見聞者。安能有聲于刑農兩大政間。光明正直。

如。是。其。卓。然。有。古。大。臣。風。哉。故。日。公。之。不。可。及。不。于。
其。去。之。日。也。于。其。留。之。日。而。常。懷。去。之。志。所。以。爲。公。
之。不。可。及。也。余。心。儀。公。之。去。而。因。以。自。愧。者。有。三。焉。
余。衰。羸。多。疾。遠。不。及。公。精。健。其。去。不。宜。後。而。友。讓。公。
先。其。可。愧。者。一。余。雖。時。刻。不。忘。去。志。而。不。能。如。公。以。
必。去。之。心。盡。未。去。之。職。其。可。愧。者。二。留。之。日。既。不。如。
公。則。雖。幸。而。得。去。求。如。公。之。人。羨。爲。榮。而。內。亦。有。以。
有。慊。萬。不。可。得。其。可。愧。者。三。嗚。呼。公。行。矣。其。亦。有。以。
處。余。也。哉。

人人議爲案入意先亭爲篇中結構後說到可愧者三正是見公不可及處詳畧變換曲盡古人之法

陳百史先生評

金文通公集卷之三終

金文通公集

卷之三

送党大司
典政序

毛